

EKALESIA FA'APOTOPOTOGA KERISIANO
I AMERIKA SAMOA

'AU LEOLEO

TUSI FAILOTU

2026



IA TATALO MA MATAALA

EKALESIA FA'APOTOPOTOGA KERISIANO
I AMERIKA SAMOA

'AU LEOLEO


TUSI FAILOTU
2 0 2 6



IA TATALO MA MATAALA

**TUSI FAILOTU 'AU LEOLEO
MATA'UPU TALOSIA 2026**

“Ia outou finafinai i le tatalo, ia mataala i lea mea ma le faafetai”
[Kolose 4:2] Ua o tatou maua mai I le Atua lenei tausaga fou, e ao ai ona tatou faafo'i atu ia te ia le taulaga o le faafetai. Ua faamanuiaina i tatou e le Atua i le galuega tele na feagai ai le Matagaluega i Kalefonia i matu. E momoli ai le faafetai i le susuga i le toeaina Siausage Siamu ma le Pulega ona o lenei galuega mae'ae'a na feagai ai, ua saunia ai se fesoasoani faaleagaga e ta'ita' ai lana Ekalesia i lenei tausaga i le tatalo, i faasoa faaleagaga, ma le ola soofaatasi ma le Atua. O le tatalo o le fatu lea o le Ekalesia, o le talanoaga paia a le Atua ma ona tagata. E faamalosi ai le faatuatua, e faaloloto ai le alofa, ma faafouina ai le faamoemoe, a o o tatou folau faatasi ma Keriso. O le faamoemoe o le a fesoasoani lenei taiala e momoli o tatou tagata i le mafutaga ma lo tatou Atua i aso uma, ma faafailele ai le soifua tatalo ma le soifua mafuta i le Atua. A o e folau i lenei tausaga, ia faamanatu pea e lenei taiala mo i tatou uma, o loo i ai le Atua i taimi uma, ma o loo ia faafofoga, ta'ita'i, ma faasusuluina lona malamalama i o tatou ala. Ia manuia lou alo malaga i lenei tausaga.



Rev. Elder Eleasaro Faataa.

TUSI FAILOTU ‘AU LEOLEO MATA’UPU TALOSIA 2026

IANUARI 03, 2026

Tusi Faitau: Eperu 11:13-22

Matua: f.17- *O le faatuatua na fai taulaga ai Aperamo ia Isaako, ina o tofotofoina o ia, o le na talia fo’i upu na folafolaina ua ia avatu ma taulaga o lona atalii e to’atasi.*

MANATU AUTU: O SEEVAE FAATUMU GATĀ.

Tatalo Fa’afetai.

- I. Ona o lona faamanatu e ala mai i augatamā, o ala o le faatuatua, e mafua ai ona fai mea sili o le tagata, mo le Atua ma lana galuega.
- II. Faafetai i lona le tuulafoa’i mai ia i tatou i taimi tatou te taumamao ai ma ia, ma tatou le talia ai ana folafolaga ua folafolaina mai.

Tatalo o le Faatoesega.

- I. Ona o lo tatou le mafuta atu i le Atua e ala i le tatalo ina ia faamalosia atili ai lo tatou faatuatua.
- II. Ona o lo tatou faataligatuli i ana folafolaga, ma ua tatou le avatu taulaga e sili ma lelei mo ia, ae ua tatou tuu mo tatou lava.

Tatalo o Mana’oga.

- I. Ina ia saga faamalosia pea i tatou i lenei tausaga fou e le mana o lona Agaga Paia i le faatuatua ma le faia o lona finagalo.
- II. Ia faatumauina pea lo tatou faatuatua i taimi o tofotofoga, ia tatou savavali i lana Upu ma ana Afioga, ia tatou avatu pea taulaga sili ma lelei mo ia.

IANUARI 10, 2026

Tusi Faitau: Ioane 1:29-34

Matua: f.29- *O le taeao ua vaai atu ai Ioane ia Iesu o malii mai ia te ia ona fai ane lea, “Faauta i le Tama’i mamoe a le Atua, na te aveesea le agasala a le lalolagi.”*

MANATU AUTU: O AI O E VAAI ATU I AI?

Tatalo o le Fa’afetai-

- I. Tatou faafetai ona o Iesu, o le Tama’i mamoe a le Atua, na te aveeseina agasala a le lalolagi. O ia lava o le faamoemoe ua taunuu, mo oe ma a’u faapea le lalolagi.
- II. Ona o lona Agaga Paia ua fai ma fesoasoani lilo mo i tatou, ma ua papatisoina ai tatou i le mafutaga faatasi ma ia e faavavau.

Tatalo o le Faatoesega.

- I. Ona ua le avea Iesu le Tama'i Mamoe a le Atua ma o tatou faamoemoega, avea ma o tatou Faaola. Ua 'alo ese le tatou vaai ma ia, ae fiafia e vaai i le lalolagi ma lona matagofie.
- II. Ona ua tatou faamoemoe pea i lo tatou potu ma le malosia ua maua, ae faatuatua'i le fesoasoani lilo a lona Agaga Paia.

Tatalo o Mana'oga.

- I. Ia faatumauina pea o tatou tagata e le Agaga Paia e vaai ia Iesu le Tama'i Mamoe a le Atua, ia fai pea o ia ma o tatou faamoemoe i lenei tausaga fou.
- II. Ia avea Iesu ma lē muamua ma lē mulimuli i o tatou ala i lenei tausaga fou. O ia lava le Tama'i Mamoe a le Atua na te aveeseina a tatou agasala ma aumai le faamoemoe lelei mo tatou lana fanau.

IANUARI 17, 2026

Tusi Faitau: Luka 5:1-11

Matua: f.4- *Ua uma lana lauga, ona fetalai atu lea o ia iā Simona, "Ina tuutuu atu ia i le loloto, ma tuu ifo ai o outou upega e maua ai ni i'a."*

MANATU AUTU: O LE A LAU UPEGA? O LĒ FEA LE TAI E AOGĀ I AI?

Tatalo o le Fa'afetai-

- I. Ona ua fai i tatou ma ona soo i le Talalelei e faailoa lona finagalo alofa i le lalolagi.
- II. Ona o vaa o le Talalelei na tuta i o tatou gataifale, ma latou aumaia le Talalelei ia Samoa ma ona tagata.

Tatalo o le Faatoesega-

- I. Ona o a tatou upega ua tumu i mea le aoga o le lalolagi, ua masaesae ai ma ua le aoga talu lo tatou faatamala.
- II. Ona ua le tuutuu o tatou sa i le loloto, ma tuu ifo ai a tatou upega e maua ai i'a, ae ua tatou tuu i le tai papa'u, auā ua tatou le faatuatua ma le faamoemoe i le Alii.

Tatalo o Mana'oga-

- I. Ia lagaina e lona Agaga o tatou lotu ia tuta o tatou vaa, tuu mea uma o lenei lalolagi, ae mulimuli i le Alii ma le faamaoni.
- II. Ia tatou manatua pea ana Afioga, o le loloto na maua ai i'a e tele, o le faatuatua ma le faalogo i ana fetalaiaga, e a'e manuia ai faiva ma galuega o lenei tausaga.

IANUARI 24, 2026

Tusi Faitau- Luka 5:29-32

Matua: f.31-32- *Ua tali atu Iesu ia te i latou, “O e malolo e le aoga i ai le foma’i, na o e mama’i. Ou te le’i sau e valaau i e amiotonu, a o e ua agasala, ina ia latou salamo.”*

MANATU AUTU: O LE FAAMOEMOE O LO TATOU ALII O IESU.

Tatalo o le Fa’afetai-

- I. Ona o le faamoemoe lelei na ia afio mai ai, na ia logoina mai mo i tatou lana fanau. O le avanoa ua ia tapenaina, ia tatou salamo ma faia lona finagalo.
- II. Ona o lana faamalologa i faama’i o le lalolagi ua aafia ai o tatou tagata, atoa ai ma lana faamagaloga o agasala o tatou faia pea i ona luma i lea aso ma lea aso.

Tatalo o le Faatoesega-

- I. Ona o lo tatou le alolofa ia te ia, ma tatou le faamoemoe i lona mana lavea’i.
- II. Ona ua ia faamalolo i tatou, ua tatou malolosi, a e ua le faaaoga mo ia lea malosi, a ua fa’aaoga mo lo tatou manuia. Ua ia faamagalo mai fo’i, ae ua le uma pea lo tatou nanau atu i le lalolagi ma ona tu’inanau.

Tatalo o Mana’oga-

- I. Ina ia manino la tatou vaai faalecagaga ma malamalama o tatou ala i lona faaali mai. O ia o le foma’i sili. E faamaloloina o tatou ma’i uma lava, e faamagalo mai a tatou agasala uma lava.
- II. Ia faamaloloina e ia o tatou tagata mama’i; ma’i o le tino, ma’i o le mafaufau, ae faapea ma’i o le agaga. Ia alofa ma fesoasoani mai i mea tatou te vaivai ai. Ia tatou faia pea lana amiotonu.

IANUARI 31, 2026

Tusi Faitau: Mareko 4:35-41

Matua: f.37- *Ona to mai lea o le afā, o le matagi tele lava; ona fati mai ai lea o peau i totonu o le vaa, ua tumu ai.*

MANATU AUTU: O AFĀ MA MATAGI TETELE.

Tatalo o le Faafetai-

- I. Ona o Iesu lo tatou malu a papa, tatou te malu ai mai afa ma matagi tetele uma lava. O a lava mea e faamalumu mai, ua uma ona ia a’oa’o ia i tatou, aua lava ne’i tatou fefefe ma matata’u, tau ina faatuatua ia te ia.

- II. Ona o lona aao ma lona mana lavea'i, ua fai pea ma lavea'i mo i tatou i la tatou savaliga i lenei tausaga, ae faapea fo'i i aso ta'itasi uma lava.

Tatalo o le Faatoesega-

- I. Tatou faatoesega ona o le vaivai ma le ninii pea o lo tatou faatuatua i le Atua, i taimi ma aso e tofotofoina ai i tatou, i mea e faasino i lana galuega ua valaauina ai tatou.
- II. Ona o tatou vaa ua tumu i peau laga ma mea le aoga o le lalolagi talu lo tatou faatamala. Ua tatou le galulue e asu ma ta i fafo le liu, o le ava malosi ma fualaau faasaina ua sao mai i totonu. Ua alo le tatou vaai, ua tatou tuua'i solo, ae ua le faia o tatou tiute faata'ita'i, aemaise tiute faamatua, ioe, tatalo, ia manumalo pea lona alofa ia Samoa ma ona tagata.

Tatalo o Mana'oga-

- I. Ia alofa mai le Atua ma faaola ia Amerika Samoa ma ona tagata, ia fesoasoani mai lona Agaga i le galuega faaolaola o le Talalelei, ia faia pea lona finagalo i le lalolagi faapei ona faia i le lagi.
- II. O a lava afa ma matagi malolosi, fai pea o ia ma o tatou lafitaga. Ia faatuputeleina lo tatou faatuatua. Ia aveese le fefe, ae ia tatou lototetele ma faamalolosi e faia lona finagalo i lenei lalolagi.

FEPUARI 07, 2026

Tusi Faitau- Isaia 29:13-16

Matua: f.13- *O le mea lea ua fetalai mai ai le Alii, Ua faalatalata mai lenei nuu ia te a'u i o latou gutu, a'u i o latou laugutu, loto ia te a'u, o lo latou mata'u fo'i ia te a'u ua a'oa'oina lea i upu a tagata.*

MANATU AUTU: E LE OLEGIA LE ATUA.

Tatalo o le Fa'afetai-

- I. Faafetai ona o lona alofa faamagalo, e ui ina tatou olegia pea o ia, e le aveesea ai lava lona alofa mo i tatou lana fanau.
- II. Faafetai i ana perofeta valaauina na latou aumaia lona finagalo, ua fai lava ana Afioga ma faamanatu taua mo soo se augatupulaga.

Tatalo o le Faatoesega-

- I. Faatoesega ona o lo tatou olegia pea o ia e ala i a tatou amioga ma mea ua tatou fai.
- II. Faatoesega ona o tatou loto vaogata, ua na ona tatou ta'uta'u lona alofa, ae ua mamao lava i tatou ma ia i le tele o taimi ma aso.

Tatalo o Mana'oga-

- I. Tatou tatalo ia alofa mai le Atua ma faia ni loto fou mo i tatou, o loto e faamaoni ma tumau ia te ia e faavavau.
- II. Tatou tatalo ia le alo ese ona fofoga ma i tatou ona o le agasala, ae ia faatumauina pea lona filemu ia Amerika Samoa ma ona tagata.

FEPUARI 14, 2026

Tusi Faitau- I Tupu 21:17-29

Matua: f.28,29- *Ona tūlei mai lea o le afioga a le Alii ia Elia le Tisepe, ua faapea mai Ua e iloa ea ua faamaulalo Aapo i o'u luma? Aua ua ia faamaulalo i o'u luma, o le mea lea out e le faaoo ai le leaga i lana nofoaiga.*

MANATU AUTU: FAASALAGA MA LE ALOFA FAAMAGALO O LE ATUA

Tatalo o le Fa'afetai-

- I. Faafetai ona o lona alofa faamagalo i o tatou leaga ma faaletonu e faia pea i ona luma.
- II. Faafetai mo lona tuu avanoa mai pea ma lona faapalepale ia tatou fanau. O lona faamoemoe alofa ia tatou lagona le salamo ma faasaga atu ia te ia e le aunoa.

Tatalo o le Faatoesega-

- I. Faatoesega ona o lo tatou matape'ape'a ma le mana'o lasi, ua tatou soli ai le va fealoa'i ma isi.
- II. Tatou faatoesega ona o lo tatou fao malo ma ua tatou le iloa ona tausia o le va fealoa'i. Ua tatou manatu ia i tatou lava, ae galo ai le fealofani ua finagalo ai le Atua.

Tatalo o Mana'oga-

- I. Tatalo mo i latou o matitiva ma le tagolima; mo i latou ua aveesega faamalosi a latou mea totino ona o e pule sauā, ia iai pea le filemu o le Atua i o latou luga.
- II. Tatou tatalo ia faatumauina e lona agaga mafutaga lelei ma le nonofo fealofani o ona tagata, ia fiafia i le faia o le lelei, ma tausisi i le filemu moni mai ia te ia.

FEPUARI 21, 2026

Tusi Faitau- Mataio 18:1-7

Matua: f.1- *"O ai ea e sili i le malo o le lagi?"*

MANATU AUTU: MALO O LE ATUA, MALO O LE TAGATA.

Tatalo o le Fa'afetai-

- I. Faafetai ona o lona faapalepale i o tatou tagata faamaualuluga ma le faasausili. Ua ia le tau i sui ae ua ia tau mai pea i lona alofa.
- II. Faafetai ona o lona faaa'oa'o mai e ala i le loto maulalo. O Iesu lava na afio mai ma fai ma auauna, na auauna atu i tagata ae le o tagata ia te ia. Ia tatou faapei o ia i lo tatou faia o galuega lelei sa ia fai.

Tatalo o le Faatoesega-

- I. Faatoesega ona o lo tatou fia mata muamua ma le manana'o ia sili atu i tatou i lo isi. Ua galo ia i tatou le alofa faasoa ma le fealofani na ia faaa'oa'o mai.
- II. Faamagalo ina ua tatou le maua le loto maulalo e tausi ai lona filemu, ua tausolomua i tatou ona faatupu o fevaevaeiga ma vesiga i totonu o tatou aiga, faapea i lana galuega.

Tatalo o Mana'oga-

- I. Tatou tatalo ia liligi ifo lona Agaga e fesoasoani ia i tatou, ia tatou tausi lona filemu ma le nofo lelei. E le o le sili i mea o le nei olaga, e le o le faamaualuga ma le faasausili, a'o le loto maulalo ua ia finagalo i ai.
- II. Tatou tatalo mo lona filemu i le lalolagi mafatia ma ona tagata o puapuagatia. Ia maua e tagata uma le nonofo lelei ma le fetausia'i, faapei ona ia faaa'oa'o mai ia i tatou lana fanau.

FEPUARI 28, 2026

Tusi Faitau- Isaia 51:4-8

Matua: f.6- *Ina tepa a'e ia outou i le lagi, ma vaai i le lalolagi i lalo; auā e mavae atu le lagi e pei o le asu,...e faapena lava ona oti o e nonofo ai; a o la'u faaolataga e a'u e le gausia lava lea.*

MANATU AUTU: FAAOLATAGA MA LE AMIOTONU A LE ATUA.

Tatalo Fa'afetai-

- I. Tatou faafetai ona o lana faaolataga e ala ia Iesu Keriso, ua ia faitaulia ai i tatou e ala i lona alofa tunoa, o tagata ese, o tagata agasala ma tumu i le faaletonu.
- II. Tatou faafetai ona o lona manuia faavavau, o le faamoemoe ua ia saunia mo tatou uma lana fanau faapea le lalolagi atoa.

Tatalo o le Faatoesega-

- I. I. Tatou faatoesega ona ua le faamaoni i tatou i lo tatou valaauina e fai ma ana mea faigaluega, i totonu o aiga faapea le atunuu ma le malo. Ia faatupu pea e ia le ola finafinai mo mea lelei i o tatou lotu.

- II. Ona o lo tatou le ola tatalo ma mafuta atu ia te ia e le aunoa. Ua tatou le faamoemoe ia te ia, a ua tatou faamoemoe i le manuia o le lalolagi, o mea e pala ma le aoga.

Tatalo o Mana'oga-

- I. Ina ia tatou iloa pea lona faaali mai, ma ia tatou iloa ona toe faafo'i atu ia te ia lona viiga e tatau ai.
- II. Ia agalelei o ia i le lalolagi o faaletonu, ua fili faatasi le lelei ma le leaga, o e matata'u ia te ia, atoa ma e le matata'u. Ia faaalua pea lana amiotonu ma ia faatumauiina pea lona alofa i luga o le lalolagi uma.

MATI 07, 2026

Tusi Faitau: Ioane 4:1-15

Matua: f.10- *Ua tali atu Iesu ia te ia, "Ana e iloa le mea foa'i fua a le Atua..... Au mai ia te a'u, ou te inu;.... e ia iā te oe o le vaiola."*

MANATU AUTU: PE ANA OU ILOA.

Tatalo Fa'afetai-

- I. Ona o Iesu le vaiola, o ia lava e ala i lona alofa ua faitaulia ai o tatou tagata i lana faaolataga e faavavau.
- II. Ona ua tatou feinu ma le malilie i ana faamanuiaga sautualasi ua ia aumaia mo i tatou lana fanau.

Tatalo o le Faatoesega-

- I. Ona o lo tatou teena pea o Iesu le vaiola ina ua suamalie ia i tatou vai o le lalolagi o tu'inaanau ma ona fiafiaga uma.
- II. Ona ua tatou augatatā ma mumusu e faasoa atu le vaiola, o Iesu ma lana Talalelei i ē o galala ma matelaina faaleagaga.

Tatalo o Manaoga-

- I. Ia fesoasoani mai lona Agaga ia tatou iloa manino lona faaali mai, ne'i tatou pogisa ona misi lea ia i tatou o ana faamanuiaga ma le vai ua ia foa'i fua mai mo le tagata.
- II. Ia puna pea i o tatou loto le vai lelei o lona alofa tunoa, ia tatou ola ai ma feinu ai e faavavau, ma faapea ona tatou faasoa atu i e o loo fia moomia.

MATI 14, 2026

Tusi Faitau: Ioane 1:1-9

Matua: f.9- *O le malamalama moni lea, na te faamalamalamaina tagata uma lava o loo ua maliu mai i le lalolagi.*

MANATU AUTU: MALAMALAMA MA LE OLA.

Tatalo Fa'afetai-

- I. Ona o lona malamalama ma ala o le amiotonu ua faamalamalamaina ai tatou faapea le lalolagi atoa.
- II. Faafetai ona o Iesu ma ana a'oa'oga lelei ua tatou maua mai le Tusi Paia, ua fai lava lea ma ta'iala i lo tatou ola faatuatua ma lana Talalelei.

Tatalo o le Faatoesega-

- I. Tatou faatoesega ona ua tatou fiafia e savavali i ala o le pogisa, ae le o ala o le malamalama.
- II. Ona o amioga ma mea faaletonu ua tatou faia, ua le atagia ai le malamalama o lona alofa ma lona faamaoni.

Tatalo o Mana'oga-

- I. Ina ia suluia pea Samoa ma ona tagata uma i le lalolagi i lona malamalama. Ia fai pea ma sulu o le ola e faavavau.
- II. Ia gauia loto o i le pogisa; ia manumalo pea le malamalama o lau afio i le soifua ma le ola o ou tagata e faailoa Iesu ma lona alofa.

MATI 21, 2026

Tusi Faitau- Esekielu 36:1-11

Matua: f. 9- *Auā faauta, ou te i ai ia te outou, ou te faasaga atu fo'i ia te outou, ona galueaiina lea outou ma faatoaina.*

MANATU AUTU : FAAATOA E LE ATUA.

Tatalo Fa'afetai-

- I. Faafetai ona o lona faaatoaina o lo tatou le atoatoa ma faamalosi lo tatou vaivai. Ua mafai ona faaoga ai o tatou tagata agasala mo ia ma lana galuega.
- II. Faafetai ona o lona le manatu mai i o tatou leaga ma faaletonu, ae ua ia galue i o tatou tagata e ala i le Agaga Paia ina ia faaatoatoaina i tatou mo lona malo e faavavau.

Tatalo o le Faatoesega-

- I. Ona o taimi e tele ua tatou fultua ai i le Atua ae faasaga atu i le lalolagi, ua le mafai ai ona faaatoatoaina i tatou i le mana o lona Agaga e faavavau.
- II. Ona ua saili le tagata mo lona lava manuia, ua faalagolago i le oa ma le tamaoaga, ae faagalo le Atua, le pogai o le ola ma le malosi uma lava.

Tatalo o Mana'oga-

- I. Ia atagia pea lona alofa ma lana amiotonu i o tatou ola, ia tatou talia ma le faafetai ana faamanuiaga, ma ia le galo le viiga e tuuina atu i lo tatou Atua.
- II. Ia iai pea o ia faatasi ma i tatou e le aunoa, ia faasaga mai ona fofoga ma faamanuia mai ia i tatou, ia faatumuina ai tatou i lona manuia faavavau.

MATI 28, 2026

Tusi Faitau- Mareko 10:32-34 (Sauni atu mo le aso Sa laupama)

Matua: f.34 “...e faatauemu i latou ia te ia,ma fasioti ia te ia; a e toe tu mai o ia i le aso tolu.”

MANATU AUTU: FAAMASANI I AI.

Tatalo Fa'afetai-

- I. Faafetai ona o Iesu ma le faaolataga na ia saunia, na faatauemu, na feanu, na sasa ma fasiotia o ia, ae ua toe tu manumalo mai le oti, ua tatou maua ai le ola e ala i lo tatou talia o ia i le salamō.
- II. Faafetai i le galuega a lona a lona Agaga Paia na tauto'aluaina lona au soo na ia valaauina e mulimuli atu ia te ia, faia lona finagalo ma faaauau lana galuega tala'i i le lalolagi.

Tatalo o le Faatoesega-

- I. Ona o le faavaivai gofie ma le faalogologo tiga, ua tatou fiafia i le ola faafifilemū ma augatatā, ae ua leai ma aunoa i le taumafai ma saili mo mea lelei.
- II. Ona o lo tatou le faamaoni i le faatinoina o tatou tiute faaekalesia ua valaauina ai tatou, mo le faaauauina o lana galuega i lenei lalolagi.

Tatalo o Mana'oga-

- I. Ia lagona pea i o tatou loto le taua o lona soifua paia na ofoina mai mo i tatou ma le faamagaloina o a tatou agasala. Ia atagia pea lona alofa tunoa i lo tatou ola faapei ona ia faia.
- II. Ia faia pea lona finagalo i le lalolagi e pei ona faia i le lagi, ma ia saga faatalitonuina pea i tatou i lona alofa faavavau, ma lona manuia e le uma mo i tatou lana fanau.

APERILA 04, 2026 (Aso Toona'i Paia)

Tusi Faitau: Auega 3:1-9, 19-24

Matua: f. 24- *Ua faapea ifo lo'u loto, O lo'u tofi o le Alii lea, o le mea lea ou te faamoemoe ai ia te ia.*

MANATU AUTU: O LO'U TOFI, O LO'U FAAMOEMOEGA LAVA.

Tatalo Fa'afetai-

- I. Faafetai aua ua fai le Alii ma o tatou tofi ma o tatou faamoemoega i taimi o le solo lelei o le soifuaga, aemaise lava taimi ma aso e oo mai ai puapuaga ma faigata ia i tatou lana fanau.
- II. Faafetai i lona alofa mutimutivale ua le faaumatia ai tatou ona o le agasala. Ua ia le tauimasui mai ae ua faaalua lona alofa faamaoni, o le alofa e fou pea i lea taeao ma lea taeao.

Tatalo o le Faatoesega-

- I. Ona o lo tatou le alolofa ma le faamaoni i le Alii, ua faia o tatou loto ma faamuamua mea o le lalolagi, ae faatuatuana'i o ia ma lona finagalo mo i tatou.
- II. Ona o uiga ma amioga lē Kerisiano o tatou faia pea, ua le atagia ai lona alofa faamagalo ma lona alofa mutimutivale. Ua manatu ifo le tagata ia te ia lava, ae galo le faamagalo ma le fealofani faapei ona ia faaa'oa'o mai.

Tatalo o Mana'oga-

- I. Ia faatumauiua pea le alofa mutimutivale o le Atua o le manumalo ia i tatou uma faapea le lalolagi atoa. Ia fou pea faaaliga o lona alofa, ia fusua ai tatou uma lana fanau.
- II. Ia atagia ia i tatou lona alofa faamagalo ma lona alofa mutimutivale, auā sa tatou agasala lava, ae ua fai o ia ma togioa, ua tatou maua ai le ola fou ma le faamoemoe mo mea sili ua ia saunia mo i tatou e faavavau.

APERILA 11, 2026

Tusi Faitau- Salamo 16

Matua: f. 8- *Ou te tuu le Alii i o'u luma e le aunoa; auā o i lo'u itu taumatau o ia, e le faagaetia ai lava a'u.*

MANATU AUTU: O FEA O E TUU AI LE ATUA?

Tatalo Fa'afetai-

- I. Faafetai auā ua fai lava o ia ma o tatou ta'iala, o lo tatou sulu ia ma lo tatou malamalama e le faagaetia ai lava tatou.
- II. Faafetai ona o lona alofa tunoa ua fai ai tatou ma tofi, o le fanau, o molimau o le Talalelei i lana faaolataga e ala ia Iesu Keriso le Faaola.

Tatalo o le Faatoesega-

- I. Ona ua tatou le faamuamua o ia i lo tatou ola, ae ua faamuamua i tatou lava ma o tatou mana'o talu le itiiti pea o lo tatou faatuatua ia te ia.
- II. Ona o lo tatou le faamaoni i lo tatou tofi ua ia aumai, ua le atagia o ia i lo tatou ola, ona o le tele o le faatamala ma le lē faautauta lelei.

Tatalo o Mana'oga-

- I. Ia faatumauiina pea lona alofa i luga ia i tatou le fanau. Ia fai o ia ma leoleo ma maluāpapa tatou te malu ai mai faigata uma o lenei olaga.
- II. Ia iloa e le lalolagi uma lona mamalu ma lona silisili ese, o ia lava o le Atua o atua, o le Alii o alii, ia viia pea lona suafa i le lagi ma le lalolagi e faavavau.

APERILA 18, 2026

Tusi Faitau- Luka 14:12-14

Matua: f. 12- *Ua fetalai atu fo'i o ia i le na tala'i mai ia te ia, "Pe a e sauni se faigaai, po o ou uso, po o tagata o lou aiga, po o tagata mauoa tou te tuaoi, ne'i latou toe tala'i mai fo'i ia te oe, ona tauia mai lea o oe.*

MANATU AUTU: IA LE O LE TAUI, A O LE ALOFA IA FAAVAE AI.

Tatalo Fa'afetai-

- I. Ona o taumafa ma mea 'ai faaleagaga o loo ia laulauina pea mo i tatou i lea aso ma lea aso. Ua tatou tali ma le agaga faafetai, ua tatou tamaoaiga i mea lelei uma ua faia ma saunia mo i tatou le fanau.
- II. Ona o lona amanaiaina o tatou tagata agasala, e talisua ma taumamafa faatasi ma ia i lona laoi paia, a'o ai ea tatou ua ia manatu mai ai? Faafetai, faafetai tele lava.

Tatalo o le Faatoesega-

- I. Ona o le faapito o le tatou tala'i ma le tatou valaau, ua tatou tala'i ma valaaulia tau o e maua mea, tau o aiga ma uo, ae ua le amanaia le tagata vaivai ma le tagata ua le tagolima.
- II. Ona ua lē lelei lo tatou faasoaina o lona tamaoaiga ua laulauina ma aumaia mo i tatou. Ua ola soona fai ma lē faautauta lelei i tatou ua galo ai le lalolagi mafatia ma fia maua le fesoasoani.

Tatalo o Mana'oga-

- I. Le Atua alofa e, ia e faailoa ma faamanino atili mai pea ala o lou alofa lē faatuaia ma le lē faapito. Ia matou ola ai ma atagia ai pea lau amiotonu ma lou alofa tatala atu e amanaia ai soo se tagata.

- II. Ia aua ne'i faapito lo matou tala'i atu o se faigaai; ia le tau o e maualuluga ma maua mea ma le tamaoaiga, ae ia valaaulia fo'i ma e matitiva ma lē tagolima. Auā o ala ia o lau afio ua e a'oa'o mai ia i matou le fanau.

APERILA 25, 2026

Tusi Faitau- Luka 15:1-7

Matua: f.4- *“O ai ea so outou e ana mamoe e selau, afai e leiloa le tasi, e le tuua e ia le ivagafulu ma le iva i le vao, a e alu ma saili i le ua le iloa, seia maua?”*

MANATU AUTU: O IESU O LE LEOLEO MAMOE LELEI.

Tatalo Fa'afetai-

- I. Faafetai auā ua fai pea o ia ma o tatou leoleo lelei, o le leoleo e faamaoni lona alofa, o le leoleo e saili mai pea ia i tatou o mamoe ua leiloa ina ia maua ma faaolaina.
- II. Faafetai i le Atua ona o Iesu, lona alo pele e toatasi, o le tama'i mamoe ua aumai e osi ai le taulaga o le faaolataga mo i tatou faapea le lalolagi atoa. Ua tatou maua ai le avanoa i le ola faavavau e ala i lo tatou taliaina o ia i le salamo ma le faatuatua e le aunoa.

Tatalo o le Faatoesega-

- I. Faatoesega ona ua tatou o ese mai le mafutaga ma lo tatou Atua, ma ua leiloa i tatou i le lalolagi o tu'inanau ma fiafiaga. Ua tatou faasili ai mo i tatou lava.
- II. Faatoesega ona o lo tatou le tumau ia te ia, e ui i lona saili mai ma avatu i tatou i le mafutaga ma ia, ae le uma lo tatou faasi'usi'umata i le lalolagi ma le ola tuai ua tatou masani ai.

Tatalo o Mana'oga-

- I. Ia aua ne'i tuua i tatou ma le lalolagi ia fano ma se atu i le malaia, ae ia saili mai ma aapa mai lona Aao lavea'i, e ta'ita'i atu i tatou uma i le mafutaga ma ia e faavavau.
- II. Ia fai pea i tatou ma leoleo mamoe lelei mo ona tagata o fia maua le fesoasoani ma matelaina i lana faaolataga. O leoleo e faamoemoeina ma faatuatuaina e tala'i lona finagalo ia soo ai le lalolagi, ma faaolaina ai ona tagata uma ua leiloa.

ME 02, 2026

Tusi Faitau- Salamo 121:1-4

Matua : f.1-2- *E faasaga a'e o'u mata i mauga, e o'o mai ai lo'u fesoasoani. O lo'u fesoasoani mai le Alii lea, o le na faia le lagi atoa ma le lalolagi.*

MANATU AUTU: O LE ATUA O LO TATOU FESOASOANI SILISILI.

Tatalo Fa'afetai-

- I. Ia tatou fa'afetai i le Atua ona o lona mafutaina pea o tatou tagata ua tatou maua ai le fesoasoani sili i mea uma tatou te faia.
- II. Ia tatou fa'afetai i le Atua ona o lona fesoasoani mai i lo tatou ola galulue i lana Galuega ua lelei ma manuia ai mea uma tatou te faia i lana Galuega.

Tatalo o le Faatoesega-

- I. Ia tatou fa'atoese i le Atua ona ua tatou le faalagolago ia te ia o lo tatou fesoasoani silisili, a ua tatou faalagolago i o tatou lava tagata.
- II. Ia tatou fa'atoese i le Atua ona ua tatou faamoemoe i le malosi ma mea ua tatou maua, a ua tatou le faamoemoe ia te ia o lo tatou fesoasoani silisili.

Tatalo o Mana'oga-

- I. Ia tatou tatalo i le Atua ina ia tumau lo tatou faatuatua ma talitonu ia te ia o lo tatou fesoasoani silisili i mea uma tatou te faia, ae maise lo tatou ola galulue i lana Galuega.
- II. Ia tatou tatalo i le Atua ina ia tatou faamoemoe ma faalagolago ia te ia auā o ia lava o lo tatou fesoasoani silisili e manuia ai mea uma tatou te faia, ae maise lo tatou ola tautua ma auauna ia te ia.

ME 09, 2026

Tusi Faitau- Mataio 6:31-33

Matua: f.33- *A ia outou mua'i saili lona malo ma lana amiotonu; ona fa'aopoopoina atu lea o ia mea uma ia te outou.*

MANATU AUTU: IA TATOU SAILI I LE ATUA MA LONA MALO MA LANA AMIOTONU.

Tatalo Fa'afetai-

- I. Ia tatou fa'afetai i le Atua ona o lona malo lea ua tatou fai malo i ai ua manuia ai o tatou tagata ma tatou maua ai le ola faavavau.
- II. Ia tatou fa'afetai i le Atua ona o lana amiotonu, o lona finagalo lea ia tatou ola ai, e iloa ai o i tatou o tagata moni o lona malo.

Tatalo o le Faatoesega-

- I. Ia tatou fa'atoese i le Atua ona ua tatou olaina uiga ma amioga a lenei lalolagi ua iloa ai o i tatou e le o ni tagata moni o lona malo.
- II. Ia tatou fa'atoese i le Atua ona ua tatou le ola ma faia lana amiotonu, a ua tatou ola ma faia mea o lenei olaga e le o talafeagai ma lo tatou ola faatuatua ia te ia.

Tatalo o Mana'oga-

- I. Ia tatou tatalo i le Atua ina ia faatumauina pea i o tatou tagata faatuatua lo tatou fai malo i lona malo, aua tatou te maua ai le manuia o lenei olaga.
- II. Ia tatou tatalo i le Atua ina ia tatou olaina ma faia lana amiotonu i aso uma auā o lona finagalo moni lea mo tatou tagata faatuatua ma talitonu ia te ia.

ME 16, 2026

Tusi Faitau- Mareko 12:41-44

Matua: f. 43- *Ona valaau atu lea o ia i ona soo, ua fetalai atu ia te i latou, “E moni, ou te fai atu ia te outou, o mea a lena fafine mativa ua oti lana tane, ua sili ia i a latou uma na lafo i ai...”*

MANATU AUTU: IA FOAI MA LE LOTO MA LE AGAGA ATOATO.

Tatalo Fa’afetai-

- I. Ia tatou fa’afetai i le Atua ona ua ia foai mai le tamaoaiga ma mea lelei uma ua tatou manuia ai i lenei olaga.
- II. Ia tatou fa’afetai i le Atua ona o le foa’i silisili mo tatou tagata e ala i le faaolataga na ia saunia ia Iesu Keriso, o le na malii ma toe tu manumalo ina ia faamagaloina o tatou tagata agasala.

Tatalo o le Faatoesega-

- I. Ia tatou fa’atoesega i le Atua ina ua tatou faia la tatou foa’i ua na o se mea e fa’ataunu’u, a ua le o I ai o tatou loto ma agaga e foa’i ai mo le Alii.
- II. Ia tatou fa’atoesega i le Atua ona ua le atoatoa ona faia la tatou foa’i ia te ia ona ua le faia i le moni ma le faamaoni, ae maise lava le ofoina atu o tatou ola mo lana Galuega.

Tatalo o Mana’oga-

- I. Ia tatou tatalo i le Atua ina ia tatou maua le agaga ma le loto faamaoni e foa’i ai o tatou ola e tautua ma auauna mo ia i lana Galuega.
- II. Ia tatou tatalo i le Atua ina ia faatumauina pea i o tatou loto ma agaga le ola foa’i moni mo le Atua e pei ona faia e lo tatou Alii Faaola o Iesu Keriso.

ME 23, 2026

Tusi Faitau- Iakopo 1:5-8

Matua : f.5- *A e afai ua leai se poto i so outou, ina ole atu ia i le Atua, o lē foa’i tele mai i tagata uma ma le lē toe ta’uta’ua; ona foa’iina mai ai lea ia te ia.*

MANATU AUTU: OLE ATU I LE ATUA.

Tatalo Fa'afetai-

- I. Ia tatou fa'afetai i le Atua i lona tali mai i mea uma tatou te ole atu ai ia te ia, lea ua tatou maua ai le tamaoaiga ma manuia ai o tatou tagata galulue i lana Galuega.
- II. Ia tatou fa'afetai i le Atua ona o le poto ma le atamai ua ia foa'i mai mo tatou tagata e faatino ai a tatou galuega ma mea uma o loo tatou faia i lenei olaga.

Tatalo o le Faatoesega-

- I. Ia tatou fa'atoese i le Atua ona ua tatou faalagolago ma faamoemoe i o tatou lava tagata, a ua tatou le maua le agaga o le ole atu i le Atua pe a tatou fia maua se fesoasoani.
- II. Ia tatou fa'atoese i le Atua ona ua tatou le manatua ona faafo'i le fa'afetai i le Atua ina ua tatou maua le tamaoaiga ma le manuia na tatou ole atu ai ia te ia.

Tatalo o Mana'oga-

- I. Ia tatou tatalo i le Atua ina ia tatou maua le agaga o le ole atu i le Atua ma le faatuatua moni, ae 'aia lava ma le masalosalo vale.
- II. Ia tatou tatalo i le Atua ina ia tumau i o tatou tagata le ola talitonu ma faatuatua i le Atua, o ia lava e tali mai i soo se mea tatou te ole atu ai ia te ia.

ME 30, 2026

Tusi Faitau- Roma 12: 1-2

Matua : f. 2- *Aua foi tou te amio faatasi ma lenei lalolagi, a e peitai ia liliuina i le toe fuataiina o outou loto, ina ia outou su'esu'e pe se a le finagalo o le Atua, o mea ua lelei, ma le mālīe, ma le atoatoa.*

MANATU AUTU: O LE OLA FAAFOUINA IA KERISO.

Tatalo Fa'afetai-

- I. Ia tatou fa'afetai i le Atua ona o lona auai ma lona mafutaina o tatou tagata e ala i lona Agaga ua faafouina ai pea o tatou ola i aso uma mai uiga tuai o lenei olaga.
- II. Ia tatou fa'afetai i le Atua ona e fou pea lona faaali mai i aso uma lava e tupu ai lagona ma manatu fou i o tatou tagata auauna ia te ia.

Tatalo o le Faatoesega-

- I. Ia tatou fa'atoese i le Atua ina ua tatou faamoemoe i le malosi ma le iloa ua tatou maua, a ua le faamoemoe ia te ia e fa'afouina ai lo tatou malosi i aso uma.

- II. Ia tatou fa'atoese i le Atua ona ua tatou faamuamua le lalolagi, a ua le faamuamua le Keriso Manumalo tatou te maua ai le ola fa'afouina i aso uma.

Tatalo o Mana'oga-

- I. Ia tatou tatalo i le Atua ina ia tumau lo tatou ola talitonu ma faatuatua ia Iesu Keriso, ua na o ia lava e to'atasi tatou te maua ai le ola fa'afouina.
- II. Ia tatou tatalo i le Atua ina ia tatou fa'atuatua' i le olaga tuai, a ia tatou ola ma tumau ia Iesu Keriso e fa'afouina ai o tatou tagata i mea fou ma mea lelei aua lo tatou ola auauna ma galulue i lana Galuega.

IUNI 06, 2026

Tusi Faitau- Iosua 1:1-9

Matua: f.6- *Ia e faamalosi ma loto tele.*

MANATU AUTU: IA FAAMALOSI MA LOTO TELE.

Tatalo Fa'afetai-

- I. Ia tatou fa'afetai i le Atua ona o loo tatou maua pea le mafuta mai o lona Agaga Paia tatou te maua ai le ola faamalolosi ma loto tetele e galulue ai pea i lana Galuega.
- II. Ia tatou fa'afetai i le Atua ona o lona faamalosi 'au mai i o tatou tagata ina ia tatou faamalolosi ma loto tetele ai pe a fetaia'i ma faigata ma mafatiaga o le Galuega.

Tatalo o le Faatoesega-

- I. Ia tatou fa'atoese i le Atua ona ua tatou le maua le loto ma le agaga e faamalolosi ma loto tetele ai e galulue i lana Galuega pe a o'o mai faigata ma mafatiaga o le Galuega.
- II. Ia tatou fa'atoese i le Atua ona ua tatou faavaivai ma solomuli i le olaina o lona finagalo ina ua manumalo taumafaiga a le fili ma lenei lalolagi i o tatou tagata auauna ia te ia.

Tatalo o Mana'oga :

- I. Ia tatou tatalo i le Atua ina ia tatou maua le ola faamalolosi ma loto tetele e tautua ma galulue ai i lana Galuega.
- II. Ia tatou tatalo i le Atua ina ia aveese mai i o tatou tagata le ola faavaivai, pe a fetaia'i ma faigata ma puapuaga o le ola galulue i lana Galuega, a ia tatou faamalolosi ma loto tetele e galulue i le Galuega a le Atua.

IUNI 13, 2026

Tusi Faitau- Kalatia 5:16-24

Matua : f.22-23- *A o le fua o le Agaga o le alofa, o le olioli, o le filemu, o le onosa'i, o le mataalofa,..... o le agamahu, ma le amio mama.*

MANATU AUTU: IA TATOU OLA I FUA O LE AGAGA O LE ATUA.

Tatalo Fa'afetai-

- I. Ia tatou fa'afetai i le Atua ona o lona Agaga Paia o loo mafutaina ma faamanatu i o tatou tagata mea lelei uma ma le olaga e tatau ona tatou ola ai.
- II. Ia tatou fa'afetai i le Atua ona o fua o lona Agaga, a o lona fina galo foi lea e tatau ona tatou ola ai auā e manuia ai i tatou ma iloa ai o i tatou o lana fanau moni.

Tatalo o le Faatoesega-

- I. Ia tatou fa'atoese i le Atua ona ua tatou le faalogo ma taliaina le musumusuga a lona Agaga Paia o loo faamanatu mai i o tatou tagata fua o le Agaga e manuia ai o tatou tagata ma mea uma tatou te faia.
- II. Ia tatou fa'atoese i le Atua ona ua tatou le ola i la le Agaga e manuia a i tatou, a ua tatou ola i le lalolagi ma ona tu'inaanau.

Tatalo o Mana'oga-

- I. Ia tatou tatalo i le Atua ina ia tumau ma mafutaina pea i tatou e lona Agaga Paia, ae maise lana musumusuga sili i o tatou tagata e manuia ai mea uma o lo tatou ola tautua ma auauna ia te ia.
- II. Ia tatou tatalo i le Atua ina ia vaaia pea i o tatou ola ma tatou olaina ma faatinoina fua o le Agaga Paia e manuia ai mea uma tatou te faia i lenei olaga, aemaise lo tatou ola galulue i lana Galuega.

IUNI 20, 2026

Tusi Faitau- Kolose 3:18-25

Matua : f.23-24- *O mea uma lava tou te faia, ia faia ma le loto, peiseai ua faia i le Alii, ae le o le tagata; auā ua outou iloa, e maua e outou mai le Alii le tau, o le tofi lea; auā ua auauna outou i le Alii o Keriso.*

MANATU AUTU: E TAUIA LE OLA GALUE MO LE ATUA.

Tatalo Fa'afetai-

- I. Ia tatou fa'afetai i le Atua i mea uma ua ia faia mo tatou tagata, aemaise lona mafuta mai e fesoasoani ai i lo tatou ola galulue i lana Galuega.

- II. Ia tatou fa'afetai i le Atua ona o le manuia ma le tamaoaiga ua tatou maua ua ia foa'iina mo tatou tagata ua tatou manuia ai i lana Galuega.

Tatalo o le Faatoesega-

- I. Ia tatou fa'atoese i le Atua ona ua tatou le faia ma olaina lona finagalo i aso uma, a ua tatou olaina le lalolagi ma ona tu'inanau.
- II. Ia tatou fa'atoese i le Atua ona ua faia o tatou loto, ae tu'u lona finagalo e tatau ona tatou olaina aua e manuia ai mea uma tatou te faia.

Tatalo o Mana'oga-

- I. Ia tatou tatalo i le Atua ina ia tumau pea lo tatou ola galulue i lana Galuega ma tatou faia mea uma e tusa ma lona finagalo.
- II. Ia tatou tatalo i le Atua ina ia vaaia i o tatou tagata le galulue faamaoni i lana Galuega, ma ia galulue ma o tatou loto ma agaga auā o ia lava e tauia lo tatou ola galulue.

IUNI 27, 2026

Tusi Faitau- Ioane 13:31-35

Matua: f.34-35- *O le poloaiga fou ou te tu'u atu ai ia te outou, ia outou fealofani; faapei ona ou alofa atu ia te outou..... O le mea lea e iloa ai e tagata uma lava o o'u so'o outou, pe afai ua outou fealofani.*

MANATU AUTU: IA OUTOU OLA FEALOFANI.

Tatalo Fa'afetai-

- I. Ia tatou fa'afetai i le Atua o loo au maia pea lona finagalo ina ia tatou maua ai le ola fealofani i totonu o tatou aiga, o mafutaga, aemaise Ekalesia.
- II. Ia tatou fa'afetai i le Atua ona o lona Alofa o loo mafuta mai ai pea i o tatou tagata e maua ai e I tatou le ola fealofani.

Tatalo o le Faatoesega-

- I. Ia tatou fa'atoese i le Atua ina ua tatou maua le ola fa'amaua, ua leai se lotomaulalo, ma ua le maua ai se ola fealofani i le va o tatou tagata, mafutaga, aiga, ma Ekalesia.
- II. Ia tatou fa'atoese i le Atua ona ua tatou o ese mai lona finagalo e maua ai le fealofani, a ua faia o tatou loto ma ola i uiga faaletagata ua le maua ai le ola fealofani.

Tatalo o Mana'oga-

- I. Ia tatou tatalo i le Atua ina ia tumau mai pea lona alofa i o tatou tagata, e maua ai le ola fealofani i totonu o tatou aiga, mafutaga, ma Ekalesia.

- II. Ia tatou tatalo i le Atua ina ia tatou olaina lona finagalo i aso uma tatou te maua ai le ola fealofani i totonu o tatou aiga, mafutaga, ae maise a tatou Ekalesia.

IULAI 04, 2026

Tusi Faitau- II Timoteo 3:14-17

Matua: f.16- *O tusi paia uma lava e mai le Agaga o le Atua ia, e aoga foi ia e a'oa'o ai, e aoa'i ai, e faatonu ai, e faapoto ai foi i le amiotonu.*

MANATU AUTU: O AFIOGA PAIA A LE ATUA.

Tatalo Fa'afetai-

- I. Ia tatou fa'afetai i le Atua ona o le moni ma le taua o ana Afioga Paia ua fai lea ma ta'iala o lo tatou ola auauna ia te ia.
- II. Ia tatou fa'afetai i le Atua ona o ana Afioga Paia o le sulu lea i o tatou vae, a o le malamalama sili foi lea i o tatou ala.

Tatalo o le Faatoesega-

- I. Ia tatou fa'atoese i le Atua ona ua tatou le tausī ma savavali i ana Afioga Paia i aso uma.
- II. Ia tatou fa'atoese i le Atua ona ua tatou le usiusita'i ma faalogo i ana Afioga Paia i le tele o aso o lo tatou ola auauna ia te ia.

Tatalo o Mana'oga-

- I. Ia tatou tatalo i le Atua ina ia tumau pea i o tatou ola i aso uma ana Afioga Paia, tatou te faatinoina ma olaina i lo tatou ola galulue ia te ia.
- II. Ia tatou tatalo i le Atua ina ia tatou olaina ma ia tumau lo tatou faatuatua ma talitonu i ana Afioga Paia, aua o le ta'iala lea o lo tatou ola auauna, a o le manuia foi lea o lo tatou ola auauna ma galulue i lana Galuega.

IULAI 11, 2026

Tusi Faitau- Ioane 4:21-26

Matua: f. 23- *A e oo mai ona aso, ua oo nei foi i ai, o e tapua'i faamaoni latou te tapua'i i le Tamā i le agaga ma le faamaoni; auā o loo saili le Tamā i e tapua'i faapena ia te ia.*

MANATU AUTU: TAPUAI I LE ATUA I LE AGAGA MA LE FAAMAONI.

Tatalo Fa'afetai-

- I. Ia tatou fa'afetai i le Atua ona o loo tatou maua pea le agaga tatou te o mai faatasi ai e ifo ma tapua'i ia te ia i aso uma o lo tatou ola.

- II. Ia tatou fa'afetai i le Atua ona o lona Agaga Paia o loo musumusuina ma mafutaina pea o tatou tagata ina ia tatou maua le ola tapuai ia te ia i aso uma.

Tatalo o le Faatoesega-

- I. Ia tatou fa'atoese i le Atua ona ua tatou le maua le agaga moni o le ola tapua'i ia te ia ma o tatou loto ma agaga.
- II. Ia tatou fa'atoese i le Atua ona ua vaivai lo tatou ola tapua'i ma le faamaoni i lo tatou Atua i aso uma o lo tatou ola auauna ia te ia ona ua tatou faamuamua mea o lenei olaga.

Tatalo o Mana'oga-

- I. Ia tatou tatalo i le Atua ina ia tatou maua faatasi le agaga moni ma le faamaoni tatou te o mai ai e ifo ma tapua'i i lo tatou Atua i aso uma o lo tatou ola auauna ia te ia.
- II. Ia tatou tatalo i le Atua ina ia tatou lagonaina le taua ma le moni o le ola tapua'i ma ia tatou tapua'i i lo tatou Atua i le agaga ma le faamaoni i aso uma o lo tatou ola galulue i lana Galuega.

IULAI 18, 2026

Tusi Faitau- Eperu 11:1-3

Matua: f.3- *O le faatuatua ua tatou iloa ai na faia mea uma i le afioga o le Atua; na faia foi mea ua vaaia i mea ua le aliali mai.*

MANATU AUTU: IA TUMAU LO TATOU FAATUATUA I LE ATUA.

Tatalo Fa'afetai-

- I. Ia tatou fa'afetai i le Atua i lona faamanatu mai pea i o tatou tagata le taua ma le moni o le ola faatuatua ia te ia i aso uma.
- II. Ia tatou fa'afetai i le Atua ona o le moni ma le taua o le ola faatuatua ia te ia e manuia ai o tatou tagata galulue i lana Galuega.

Tatalo o le Faatoesega-

- I. Ia tatou fa'atoese i le Atua ina ua vaivai ma ua le faamaoni lo tatou ola faatuatua ia te ia ona ua tatou ola i la le lalolagi ma ona tu'inanau.
- II. Ia tatou fa'atoese i le Atua ona ua tatou faatuatua i lo tatou malosi ma mea ua tatou maua, a ua leai so tatou faatuatua ia te ia e manuia ai mea uma tatou te faia.

Tatalo o Mana'oga-

- I. Ia tatou tatalo i le Atua ina ia tumau lo tatou ola faatuatua ia te ia e manuia ai o tatou tagata ma mea uma tatou te faia.

- II. Ia tatou tatalo i le Atua ina ia tumau lo tatou ola ma talitonu, o le faatuatua ia te ia i aso uma e manuia ai o tatou tagata galulue ia te ia.

IULAI 25, 2026

Tusi Faitau- Salamo 118:21-25

Matua: f. 24- *O le aso lenei ua faia e le Alii; ia tatou olioli ma fiafia i ai.*

MANATU AUTU: IA TATOU OLIOLI MA FIAFIA I LE ALII.

Tatalo Fa'afetai-

- I. Ia tatou fa'afetai i le Atua ona o lona mafuta mai i o tatou tagata o loo tatou maua ai pea le olioli ma le fiafia e galulue i lana Galuega.
- II. Ia tatou fa'afetai i le Atua aua o ia lava tatou te maua ai le olioli ma le fiafia moni, ina ia tumau ai pea lo tatou ola tautua ma galulue i lana Galuega.

Tatalo o le Faatoesega-

- I. Ia tatou fa'atoese i le Atua ona ua tatou le maua le ola olioli ma fiafia e galulue ai i lana Galuega, ona ua toilalo o tatou tagata i fiafiaga o lenei olaga.
- II. Ia tatou fa'atoese i le Atua ona ua tele ona tatou olioli ma fiafia i mea o lenei olaga, a ua tatou le maua le olioli ma le fiafia e olaina lona finagalo.

Tatalo o Mana'oga-

- I. Ia tatou tatalo i le Atua ina ia tatou maua le olioli ma le fiafia e tautua ma galulue ai i lana Galuega.
- II. Ia tatou tatalo i le Atua ina ia tatou maua pea le olioli ma le fiafia i o tatou tagata, tatou te faia ai mea uma e tusa ma lo tatou ola valaauina i lana Galuega.

AOKUSO 01, 2026

Tusi Faitau- Efeso 6:10-20

Matua: f.14-17- *O lenei, ina tutumau ia outou o fausia o outou sulugatiti i le faamaoni, ia oofu foi outou i le ufifatafata o le amiotonu; ia faaopoopo i na mea uma ona tago atu i le talipupuni o le faatuatua, tou te mafai ai ona tinei o u faafana mu uma lava a lē o loo leaga. Ia outou ave foi le puloutau o le faaolataga,..... o le afioga lea a le Atua.*

MANATU AUTU: O OFU TAU ATOATO A O LE OLA AUAUNA I LE ATUA.

Tatalo Fa'afetai-

- I. Ia tatou fa'afetai i le Atua ona o ofutau o le ola faalecagaga o loo tatou oofu ai e mafai ai ona tatou tetee atu i le fili ma taumafaiga a le tiapolo.
- II. Ia tatou fa'afetai i le Atua ona o ofutau ua ia aumaia tatou te oofu ai ua mafai ai ona malu puipuia lo tatou ola mai le lalolagi ma ona tu'inaanau.

Tatalo o le Faatoesega-

- I. Ia tatou fa'atoese i le Atua ona ua tatou le oofu i ofutau faalecagaga, a ua tatou oofu i ofutau o lenei olaga ua toilalo ai i tatou i uiga o lenei lalolagi.
- II. Ia tatou fa'atoese i le Atua ina ua tatou le taliaina ofutau mai le Atua e mafai ai ona tatou tetee atu i faiga a le tiapolo.

Tatalo o Mana'oga-

- I. Ia tatou tatalo i le Atua ina ia tatou oofu i ofutau mai ia te ia e mafai ai ona malu puipuia lo tatou ola mai taumafaiga ma fa'aosoosoga a le tiapolo.
- II. Ia tatou tatalo i le Atua ina ia tatou taliaina ma o tatou loto ma agaga ofutau mai ia te ia ma ia tatou oofu ai e mafai ai ona tatou manumalo mai le lalolagi ma ona leaga.

AOKUSO 08, 2026

Tusi Faitau- Isaia 51:1-3

Matua: f.3- *Auā e faamafanafanaina Siona e le Alii, e faamafanafanaina ana mea faatafunaina uma lava; na te faia lona fanua lafulafua e pei o Etena, ma lona toafa e pei o le faatoaga a le Alii; e maua ai le fiafia ma le olioli, o le fa'afetai ma le leo o le pese.*

MANATU AUTU: O LE FAAMAFANAFANAGA SILI E MAI LE ATUA.

Tatalo Fa'afetai-

- I. Ia tatou fa'afetai i le Atua ona o loo tatou maua pea lona mafanafana pe a tatou fetaiai ma puapuaga ma faanoanoaga o lenei olaga.
- II. Ia tatou fa'afetai i le Atua ona o lona Alofa le mavae i o tatou tagata ma ua tatou maua ai pea le faamafanafanaga sili pe a oo mai faigata i lo tatou ola auaua ia te ia.

Tatalo o le Faatoesega-

- I. Ia tatou fa'atoese i le Atua ona ua tatou le manatua ma faamoemoe ia te ia tatou te maua ai le faamafanafanaga sili pe a oo mai puapuaga i o tatou tagata.

- II. Ia tatou fa'atoese i le Atua ona ua tatou manatu i o tatou lava tagata e maua ai lo tatou faamafanafanaina.

Tatalo o Mana'oga-

- I. Ia tatou tatalo i le Atua ina ia tumau lo tatou talitonu ma faatuatua ia te ia aua o ia lava tatou te maua ai le faamafanafanaga sili.
- II. Ia tatou tatalo i le Atua ina ia avefa I tatou ma faamafanafanaga i o tatou tagata.

AOKUSO 15, 2026

Tusi Faitau- Filipi 4 :10-13

Matua: f.13- *Ou te mafai mea uma lava ona o ia ua faamalosi mai ia te a'u.*

MANATU AUTU: O LE ATUA FAAMALOSI 'AU.

Tatalo Fa'afetai-

- I. Ia tatou fa'afetaia le Atua ona o lona faamalosi 'au mai i o tatou tagata ina ia tatou faamalolosi e auauna ma galulue mo ia pe a fetaia'i ma puapuaga ma faigata o lenei olaga.
- II. Ia tatou fa'afetai i le Atua i lona mafuta mai pea i o tatou tagata e ala i lona Agaga Paia ua mafai ai ona tatou galulue ma faia mea uma e tusa ma lona finagalo.

Tatalo o le Faatoesega-

- I. Ia tatou fa'atoese i le Atua ina ua tatou le lagonaina ma taliaina le faamalosi 'au mai a lona Agaga Paia ia i tatou ona ua tatou manatu i mea o lenei lalolagi.
- II. Ia tatou fa'atoese i le Atua ina ua tatou le savavali ma ola e tusa ma lona finagalo tatou te maua ai le agaga o le faamalosi 'au i o tatou tagata, aiga, ma Ekalesia.

Tatalo o Mana'oga-

- I. Ia tatou tatalo i le Atua ina ia faatumauiina i o tatou tagata le ola talitonu ma faatuatua ia te ia, o ia lava tatou te maua ai le faamalosi 'au silisili pe a tatou fetaia'i ma puapuaga o lenei olaga.
- II. Ia tatou tatalo i le Atua ina ia tatou maua le agaga o le faamalosi 'au tatou te faamalosi ai ia i latou o loo feagai ma faigata ma mafatiaga o lenei olaga.

AOKUSO 22, 2026

Tusi Faitau- Faataoto 3:1-6

Matua: f.3-4- *'Aua nei te'a ma oe le alofa ma le faamaoni, ia asoa ai i lou ua; ia e tusi ai i le papa o lou loto; ona e maua ai lea o le alofa ma le manuia lelei i luma o le Atua, atoa ma tagata.*

MANATU AUTU: IA TUMAU I LE ALOFA MA LE FAAMAONI.

Tatalo Fa'afetai-

- I. Ia tatou fa'afetai i le Atua ona o lona alofa loo tumau mai pea i o tatou tagata, e malu puipuia ma lavea'iina ai i tatou mai faigata o lenei olaga.
- II. Ia tatou fa'afetai i le Atua i lona faamaoni e faia mea uma mo tatou tagata, ua tatou manuia ai i lo tatou ola auauna ma galulue i lana Galuega.

Tatalo o le Fa'atoesega-

- I. Ia tatou fa'atoese i le Atua ona ua tatou le faatinoina i o tatou ola le uiga moni o lona alofa e pei ona ia faailoa mai ia i tatou.
- II. Ia tatou fa'atoese i le Atua ina ua le faamaoni o tatou tagata i le faatinoina o tatou tofi ma tiute e pei ona valaauina ai i tatou i lana Galuega.

Tatalo o Mana'oga-

- I. Ia tatou tatalo i le Atua ina ia tatou tumau ma ola i le alofa, e pei ona faatinoina e lo tatou Alii Faaola o Iesu Keriso e ala i le Faaolataga na ia saunia mo tatou tagata agasala.
- II. Ia tatou tatalo i le Atua ina tatou maua le ola faamaoni i mea uma tatou te faia, aemaise lava lo tatou soifua valaauina i lana galuega.

AOKUSO 29, 2026

Tusi Faitau- Mataio 28:16-20

Matua : f.19-20- *O lenei, ia outou o atu e fai nuu uma lava ma soo, ma papatiso atu ia te i latou i le suafa o le Tamā, ma le Atalii, ma le Agaga Paia; ia outou a'oa'o atu ia te i latou..... ua ou fai atu ai ia te outou.*

MANATU AUTU: UA VALAAUINAI TATOU MO LE GALUEGAA LE ATUA.

Tatalo Fa'afetai-

- I. Ia tatou fa'afetai i le Atua ona o lona faamalosi 'au mai i o tatou tagata ina ia tumau pea lo tatou ola tautua ma galulue i lana Galuega.
- II. Ia tatou fa'afetai i le Atua i lona valaauina o tatou e fai ma ave feau ma galulue e tala'i lona finagalo i tagata o lenei lalolagi.

Tatalo o le Faatoesega-

- I. Ia tatou fa'atoese i le Atua ina ua tatou le faamaoni i lo tatou ola valaauina e fai ma ave feau e tala'i ma faailoa lona finagalo i le lalolagi.
- II. Ia tatou fa'atoese i le Atua ina ua tatou tala'i ma faailoa o tatou tagata, a ua tatou le faamuamua ona tala'i o ia ma lona finagalo.

Tatalo o Mana'oga-

- I. Ia tatou tatalo i le Atua ina ia tatou maua le agaga ma le loto e tautua ma auauna ai, ae maise o lo tatou faamaoni e tala'i ma faailoa le Atua ma lona finagalo.
- II. Ia tatou tatalo i le Atua ina ia faatumauiina pea i o tatou tagata galulue le agaga moni ma la tatou matafaioi tausii, o i tatou na valaauina e le Atua e galulue e fai ma ave feau, e talai lona finagalo i tagata ma lenei lalolagi.

SETEMA 05, 2026 (A o lumana'i le Aso Sa o le Tala lelei)

Tusi Faitau- Galuega 5:33-42

Matua: f.42- *Ua le mapu foi i latou i aso uma ona a'oa'o atu, ma tala'i atu i le malumalu, ma lea fale ma lea fale le tala lelei o Iesu le Keriso.*

MANATU AUTU: IA LE MAPU ONA FAAILOA LE TALA LELEI O IESU LE KERISO.

Tatalo Fa'afetai-

- I. I le fialia ma le lototele ua foaiina i le ekalesia ma le au faatuatua e molimau ai i le tala lelei ia Iesu Keriso.
- II. I le galuega tala'i a le ekalesia ua soo ai le lalolagi i le tala lelei ma avea ai nuu uma ma soo o Iesu Keriso.

Tatalo o le Fa'atoesega-

- I. Ina ua tatou manatu e leai sa tatou mea e fai mo le faalauteleina o le tala lelei.
- II. Ina ua gugu le ekalesia i le faamata'u mai, ia le ta'uta'u le suafa o Iesu le Keriso.

Tatalo o Mana'oga-

- I. Ia galue mai pea le Agaga Paia ina ia fai ai i tatou ma molimau faamaoni i le tala lelei.
- II. Ia amata lava i o tatou aiga, nuu, le atunuu la tatou molimau i le tala lelei o le malo o le Atua.

SETEMA 12, 2026

Tusi Faitau- Mareko 5:14-20

Matua: f.19- *A o Iesu ua le mafai, a ua fetalai atu ia te ia, "Alu atu ia oe i lou fale, i lou aiga, ma ia e ta'u atu ia te i latou mea tetele ua faia e le Alii ia te oe, ma lona alofa ia te oe."*

MANATU AUTU: TA'U ATU MEA TETELE UA FAIA E LE ALII IA TE OE, MA LONA ALOFA IA TE OE.

Tatalo Fa'afetai-

- I. Ona o le Atua ua faia mea tetele e olioli ai lana fanau, lana ekalesia, ma lona atunuu.
- II. E ui i lo tatou faatauva'a ma le toilalo, a ua alofa mai pea le Atua ia i tatou.

Tatalo o le Faatoesega-

- I. Ina ua masalosalo pea o tatou loto i le Atua fai measili mo i tatou.
- II. Ina ua vaaia pea vavega tetele ua faia e le Atua, ae faatuai lava ona talitonu o tatou loto i le Atua.

Tatalo o Mana'oga-

- I. Ia fa'aaogaina pea i tatou e molimau i mea ofoofogia ua faia e le Atua.
- II. Ina ia le tuu le tala'i, a ia valaau pea ia ola ai tagata e toatele ma ia viia ai le Atua.

SETEMA 19, 2026

Tusi Faitau- Filipi 4:10-13

Matua: f.13- *Ou te mafaia mea uma lava ona o ia ua faamalosi mai ia te au.*

MANATU AUTU: TATOU TE MAFAIA MEA UMA ONA O KERISO.

Tatalo Fa'afetai-

- I. Ona o le Alii o loo auai mai i taimi uma ma fesoasoani mai ia i tatou.
- II. I le moni o folafolaga a le Alii, "Ou te ia te outou i aso uma lava e oo i le gataaga o le lalolagi."

Tatalo o le Faatoesega-

- I. Ina ua tatou faalagolago i lo tatou malosi ma le poto ae faatuatua'i le Alii.
- II. Ina ua masalosalo o tatou loto i le Alii ma lona mana tatou te mafaia ai mea uma.

Tatalo o Mana'oga-

- I. Ia utufia i tatou i le poto mai le lagi tatou te mautinoa ai tatou te mafaia mea uma ona o le faamalosi mai o Keriso.
- II. Ia faamoemoe le ekalesia ma le au faatuatua i le Keriso ma lona mana.

SETEMA 26, 2025

Tusi Faitau- Esekielu 36:25-29

Matua: f.26- *Ou te avatu foi ia te outou le loto fou, ma ou tuu i totonu ia te outou le agaga fou; ou te aveesea, ... ma avatu ia te outou le loto aano.*
MANATU AUTU: SUIA LE LOTO MAAA I LE LOTO AANO.

Tatalo Fa'afetai-

- I. Ona o le Atua na te le taofia se mea na te silafia tatou te manuia ai.
- II. I suiga fou a le Atua i o tatou tagata ina ia tatou lagona lona finagalo.

Tatalo o le Faatoesega-

- I. I lo tatou mumusu e tuuina atu o tatou loto i le Atua na te faafouina.
- II. I le maaa pea o tatou loto, ua tatou le iloa atu ai le Atua.

Tatalo o Mana'oga-

- I. Ia galue mai pea le Agaga o le Atua i o tatou loto ia mamā ma tatou iloa ai le Atua.
- II. Ia tatou lagona o le loto aano, o le loto e usita'i i le Atua ma faia lona finagalo.

OKETOPA 03, 2026

Tusi Faitau- Salamo 136

Matua: f.1- *Ia outou vivii atu i le Alii, auā e lelei o ia; auā e faavavau lava lona alofa.*

MANATU AUTU: IA TELE LE FAAFETAI I LE ALII ONA E LELEI O IA, E FAAVAVAU LONA ALOFA.

Tatalo Fa'afetai-

- I. Ina ua tuai ona oo mai lona to'asa, a ua lise mai lona alofa ia i tatou i aso uma lava.
- II. Ona o lona alofa ma lona faamaoni e au tupulaga lava lea.

Tatalo o le Faatoesega-

- I. Ina ua galo le faafetai i le Atua i vavega alofa ua ia faia mo i tatou ua tatou ola ai.
- II. Ina ua ta'uta'u o tatou lelei i luma o le Atua, ae galo lona viiga i mea ua foai mai.

Tatalo o Mana'oga-

- I. Ina ia atagia i o tatou ola le faafetai i le Alii i le faavavau o lona alofa.
- II. Ina ia o faatasi upu ma galuega mo le viiga o le Atua.

OKETOPA 10, 2026 (A o lumana'i le Aso Sa Lotu Tamaiti)

Tusi Faitau- II Korinito 6:14-18

Matua: f.18- *E fai foi a'u mo outou Tamā, e fai foi outou mo'u atalii ma o'u afafine, ua fetalai mai ai le Alii e ona le malosi uma lava.*

MANATU AUTU: O LE TAMĀ LELEI I LANA FANAU.

Tatalo Fa'afetai-

- I. Ina ua avea i tatou ma ana fanau e agalelei ma tausī i ai.
- II. Auā e leai se mea tatou te matitiva ai, ina ua fai le Atua ma Tamā lelei mo tatou uma lana fanau.

Tatalo o le Faatoesega-

- I. Ina ua avea i tatou ma fanau ua fulitua i le Atua lo tatou Tamā.
- II. Ina ua tatou faoa mea e ono i lo tatou Atua, le Tamā agalelei.

Tatalo o Mana'oga-

- I. Ina ia avea i tatou ma fanau faatuatua, fanau usita'i i le Atua.
- II. Ina ia fai i tatou ma ana fanau ae fai o ia ma o tatou Atua.

OKETOPA 17, 2026

Tusi Faitau- Eperu 12:25-29

Matua: f.28- *O lenei, ua maua e i tatou le malo e le mafai ona luluina, ia tatu faafetai ai, tatou te auaua ai i le Atua ma le migao, ma le mata'u ia fiafia mai ai o ia.*

MANATU AUTU: UA TATOU MAUA MAI LE ATUA LE MALO E LE MAFAI ONA LULUINA.

Tatalo Fa'afetai-

- I. Ona o le malo ua saunia mo i tatou e tumau e faavavau.
- II. Ona o le malo ua ofoina mai mo i latou uma o e talia ma faatuatua ia te ia.

Tatalo o le Faatoesega-

- I. Ina ua faananau o tatou loto i malo o le lalolagi, o mea e le tumau.
- II. Ina ua tatou le mua'i saili le malo o le Atua ma lana amiotonu.

Tatalo o Mana'oga-

- I. Ia tatou mautinoa o le malo o le Atua o le mafutaga faatasi ma le Atua i le ola faavavau.
- II. Ia tatou maua faamanuiaga o le malo o le Atua e faatino ai lo tatou valaauina i le lalolagi.

OKETOPA 24, 2026

Tusi Faitau- Isaia 55:1-5

Matua: f.1- *E! outou uma o e fia inu, o mai ia i le vai, atoa ma outou ua leai ni tupe, o mai ia, ina faatau ma aai; ia outou o mai lava, ma faatau le uaina ma le suāsusu, a e leai se tupe, e leai foi se tau e faatau a'i.*

MANATU AUTU: E LE FAATAUINA MANUIA MAI LE ATUA.

Tatalo Fa'afetai-

- I. Ona o manuia mai le Atua ua faamalieina ai lo tatou galala ma lo tatou matelaina e le gata i le tino, a o le agaga.
- II. Ona o manuia mai le Atua o mea ua tatou maua fua, e leai se tau.

Tatalo o le Faatoesega-

- I. Ina ua tatou saili i mea o le lalolagi e faamalieina ai o tatou mana'o.
- II. Ina ua tatou le faasoa atu i nisi, e pei ona tatou maua fua mai le Atua.

Tatalo o Mana'oga-

- I. Ia lagona pea le valaau alofa a le Atua ina ia o mai ia te ia e maua ai le ola.
- II. Ia lagona le taua o le tolo'a'i oa faalelagi, ae le o oa faalelalolagi.

OKETOPA 31, 2026

Tusi Faitau- Salamo 139

Matua: f.1- *Le Alii e, ua e suesue mai ia te au, ua e silafia lava a'u.*

MANATU AUTU: O LE SILAFAGA A LE ALII.

Tatalo Fa'afetai-

- I. Ua silafia e le Alii o tatou manatunatuga ma a tatou fuafuaga.
- II. Ona e leai se mea e lilo i lana silafaga.

Tatalo o le Faatoesega

- I. Ina ua taumafai le tagata e solaese mai le Alii ona ua ia silafia mea uma.
- II. Ina ua fefe le tagata i le mata'utia o le Alii ae le avea ma ala e talia ai lona faatauva.

Tatalo o Mana'oga-

- I. Ia avea le silafaga ati a le Atua ma faamafanafanaga sili mo tatou loto popole.
- II. Ia tosina o tatou loto i le Alii o silafia mea uma, ae le o le 'alo ai i le faia o lona finagalo.

NOVEMA 07, 2026

Tusi Faitau- Kalatia 6:1-5

Matua: f.4,5- *A ia taitasi ma faamasino i lana lava galuega,.. lea o se mea e mitamita ai ia te ia lava,.....Auā e taitasi ma ave i lana lava avega.*

MANATU AUTU: IA TAUMAMAO MA LE OLA FAATUSATUSA.

Tatalo Fa’afetai-

- I. Ona o aoaoga a Keriso ua faailoa mai ai le taua o le ola felagolagoma’i.
- II. Ona o manuia ua tofusua ai lana fanau; o le tagata ma lana mai le Atua ma ia faaoga mo lona viiga.

Tatalo o le Faatoesega-

- I. Ina ua manatu faamaualuga le tagata i mea ua na maua ma vaai maualalo ai i nisi.
- II. Ina ua maua i tatou i aga faafaresaio e lau o tatou lelei i le Atua ma mea e tele ua tatou faia.

Tatalo o Mana’oga-

- I. Ia maua i tatou i le lotomaulalo e talia ai ma le fiafia mea ua i o tatou lima.
- II. Ia aoaoina i tatou e le o le tele o mea le mea taua, a o le ola fefaasoa’i ma nisi ua mana’omia le fesoasoani.

NOVEMA 14, 2026

Tusi Faitau- Ioane 16:22-24

Matua: f.22- *O lenei foi, ua maua nei outou e le faanoanoa; a e tatou te toe feiloai ma a’u, ona olioli ai lea o outou loto, e le aveeseina foi e se tasi lo outou olioli.*

MANATU AUTU: O LE OLIOLI E LE MAFaIA E SE TASI ONA AVEESEINA.

Tatalo Fa’afetai-

- I. Ona o le alofa tunoa o le Atua ua faaalua ia Iesu Keriso, ua tatou maua ai le olioli ua atoatoa.
- II. Ina ua liua e le Atua le faanoanoa o tatou tagata i le olioli e le mafaia e se tasi ona aveeseina.

Tatalo o le Faatoesega-

- I. Ina ua manumalo tiga ma faigata i o tatou tagata ma faanoanoa ai e pei o ē ua leai se faamoemoe.
- II. Ina ua tatou manatu o le olioli e tumau e maua i fiafiaga o le olaga.

Tatalo o Mana'oga-

- I. Ia tumau le olioli o le Alii i lana ekalesia e fai ma auupega mo lona valaauina.
- II. Ia lagona e o tatou tagata o le maliu ma le toe tu o Iesu ua tatou maua ai le olioli e le mafai e se tasi ona aveeseina.

NOVEMA 21, 2026

Tusi Faitau- I Tupu 19:9-18

Matua: f.12- *E mulimuli i le mafuie o le afi; e lei i ai le Alii i le afi; e mulimuli i le afi o le leo filemu ma le itiiti.*

MANATU AUTU: INA IA LAGONA LE ATUA, TAU LAVA O LE FAALOLOGO.

Tatalo Fa'afetai-

- I. Ona o le Atua o loo fetalai mai pea i o tatou tagata.
- II. Ona o loo tatou auauna i le Atua o loo soifua pea ma o loo galue pea mo le manuia o mea uma na ia fai.

Tatalo o le Faatoesega-

- I. Ona ua alu o tatou taimi i mea le aoga ua le lagona ai i le siufofoga o le Atua.
- II. Ona ua leai se taimi paganoa e mafuta atu ai i le Atua ma lagona ai lona fetalai mai.

Tatalo o Mana'oga-

- I. Ia aoaoina i tatou ia faaavanoa taimi e saili ai i le Atua.
- II. Ia lagona lo tatou valaauina e le Atua e tineia le ifo i tupua ma le faamoemoe o le tagata i lona malosia.

NOVEMA 28, 2026

Tusi Faitau- Teuteronomi 4:25-31

Matua: f.29- *A e afai tou te toe saili i le Alii lou Atua i lea mea, ona e maua lea o ia,..... te ia ma lou loto atoa ma lou agaga atoa.*

MANATU AUTU: SAILI I LE ALII MA LE LOTO ATOA MA LE AGAGA ATOA

Tatalo Fa'afetai-

- I. Ona e ui ina le vaaia le Atua, ae a saili i le Atua ma le loto atoa ma le agaga atoa tatou te maua lava o ia.
- II. Ona o le Atua e pa'ia, peitai e le taumamao ma le tagata eleelea ma le toilalo i mea leaga.

Tatalo o le Faatoesega-

- I. Ona ua saili le tagata i atua ese ma tupua mamate, ae faatuatuana'i le Atua o le ola.
- II. Ona ua tatou talitonu i le Atua o mafauauga ae le o le Atua o galue i o tatou loto ma o tatou agaga.

Tatalo o Mana'oga-

- I. Ia ofoina i le Atua mea atoatoa (loto ma le agaga) a e le o fasi mea.
- II. Ia talitonu ma le loto atoa o loo latalata mai lava le Atua ia i tatou.

TESEMA 05, 2026

Tusi Faitau- Ieremia 29:10-14

Matua: f.11- *Auā o a'u nei, ua ou iloa manatu ua ou manatu ai ia te outou, o manatu i le manuia, a e le o le malaia, o loo fetalai mai ai le Alii, e foaiina atu ia te outou le iuga e i ai le faamoemoe.*

MANATU AUTU: E MANATU LE ALII MO LOU MANUIA, A E LE O LE MALAIA.

Tatalo Fa'afetai-

- I. Ona o ala o manuia ua saunia e le Atua mo lana fanau, ae maise le faaolataga ua tatou saoloto ai.
- II. I le valaauina pea o i tatou ma lana ekalesia e molimau i manuia o lona malo ua saunia mo i tatou ma le lalolagi.

Tatalo o le Faatoesega-

- I. I le pumoomoo o la tatou vaai i gaoioiga tetele o loo faia pea e le Atua mo le manuia o tagata uma.
- II. Ona e tele taimi tatou te manatu ua na o i tatou o faamanuia i ai le Atua. A e galo ai o le Atua o le foafoaga e finagalo ina ia manuia mea uma na ia faia.

Tatalo o Mana'oga-

- I. Ia maua le lototele e le ekalesia ma le au faatuatua e molimau i manuia o le Atua, ae maise foi le iuga o le tagata e fultua i le Atua.
- II. Ia aoaoina o tatou loto o mea tiga e oo mai, e a'oa'oina ai I tatou ina ia tatou iloa le suamalie o manuia o lo tatou Atua ma lona malo.

TESEMA 12, 2026

Tusi Faitau- I Ioane 3:11-18

Matua: f.17,18- *O se ua i ai le oa a le lalolagi nei, pe a iloa atu e ia lona uso ua mativa, a e punitia lona loto alofa ia te ia, pe faapefea ona tumau o le alofa i le Atua i lea tagata? La'u fanau e, aua ne'i tatu alolofa tau o le upu ma le gutu, a o le amio ma le faamaoni.*

MANATU AUTU: O LOU ALOFA I LE ISI TAGATA, O LOU ALOFA LAVA LENA I LE ATUA.

Tatalo Fa'afetai-

- I. Ona o le vaitau o le Ativeni e auga i le alofa o le Atua ia i tatou ma le lalolagi atoa.
- II. Ona o le Atua ua manatu mai i le tagata, ua liutino tagata ai e ala ia Iesu Keriso e faaalai ai le faamaoni o lona alofa.

Tatalo o le Faatoesega-

- I. Ona ua tatou taulagi lo tatou alofa i le Atua, ae inoino i o tatou tuaoi.
- II. Ona ua tatou alolofa ina ia maua se tau pe ina ia viia ai i tatou.

Tatalo o Mana'oga-

- I. Ina ia fesoasoani mai le Agaga o le Atua ina ia faatino lo tatou alofa ae le na o upu.
- II. Ia aoao mai pea le Agaga o le Alii ina ia tatou ola i le faataualofa, ae le o le faatalitali alofa.

TESEMA 19, 2026

Tusi Faitau- Isaia 9:6-7

Matua: f.7- *E leai se mea e gata mai ai ona tele o lona malo ma le filemu o lona malo i le nofoālii o Tavita ma lona malo, e faatumauina, ma faamausli i le faamasinoga ma le amiotonu, e afua mai i ia ona po e oo i le faavavau; e faia lea mea i le maelega o le Alii o 'au.*

MANATU AUTU: O LE MALO O LE ATUA, O LE MALO TELE MA LE MALO FILEMU.

Tatalo Fa'afetai-

- I. Ona o valoaga i le fanau mai o le Mesia ua taunuu ma molimauina i le vaitau o le Ativeni i le fanau mai o Iesu Keriso.
- II. Ona o le malo ua aumaia e Iesu o le malo filemu e tinea le feitaga'i ma le fefulitua'i o malo o le lalolagi.

Tatalo o le Faatoesega-

- I. Ina ua tatou le manatu e tausi le filemu i le va ma isi, a ua silimusa i tatou ona faatupu le vevesi.
- II. Ina ua vaivai le ekalesia i lona galue i ala e atagia ai le filemu o le Atua i le lalolagi.

Tatalo o Mana'oga-

- I. Ina ia le tuua le tatalo e pei ona aoao mai le Alii, “ia oo mai lona malo, ma ia faia lona finagalo i le lalolagi e pei ona faia i le lagi.
- II. Ina ia mitamita le au faatuatua i lo latou ta'u, o i latou o atalii ma afafine o le Atua, e ala i lo latou faatupuina pea o le filemu.

TESEMA 26, 2026

Tusi Faitau- Roma 15:7-13

Matua: f.12,13- *Ua toe faapea mai foi Isaia, E i ai le Aa o Iese; o ia foi na te tulai e pule i nuu ese, e faatuatua ia te ia nuu ese. O le Atua foi e tupu mai ai le faamoemoe, ia faatutumuina outou e ia ile olioli uma atoa ma le filemu, ina ua faatuatua; ina ia tele lava lo outou faamoemoe ona o le mana o le Agaga Paia.*

MANATU AUTU: O LE ATUA O LE FAAMOEMOE, LE ATUA O LE OLIOLI, LE ATUA O LE FILEMU.

Tatalo Fa'afetai-

- I. Ona o le vaitau o le Ativeni ma le fanau mai o le faaola o le lalolagi, ua tino ai faamoemoega o aso ua mavae, ma aumai ai le olioli ma le filemu i le lalolagi.
- II. Ona o le finagalo alofa o le Atua ma lona faamoemoe ina ia faaolaina le lalolagi o tagata agasala, ua liutino tagata ai e ala ia Iesu Keriso ua fanau mai.

Tatalo o le Faatoesega-

- I. Ina ua afio mai le Mesia mai le Atua, ae le taliaina e o tatou tagata.
- II. Ona ua le ola le lalolagi i le ala maulalo na uia e le Atua e ala ia Iesu Keriso, a ua faamaualuga pea le tagata i lona loto.

Tatalo o Mana'oga-

- I. Ia aumai le olioli o Keriso ma lona filemu ia tumu ai loto o le lalolagi vevesi i le vaitau o le Ativeni ma le aga'i atu i le tausaga fou.
- II. Ia tofu maua e le ekalesia ma le lalolagi faamanuiaga o le Kerisimasi a o se tausaga fou manuia i le alofa o le Atua o Faamoemoega Lelei, le Atua o le Olioli, ma le Atua o le Filemu.



Tautua Printing Press
1 Kanana Fou St, P.O. Box 1537
Kanana Fou, American Samoa 96799
(684) 699.9810
<https://efkas.org>